



So gleycher weyß wie ich den cubus in ein abgestolen gemel gebracht hab/also mag man alle corpora die man in grund legen vnd aufziehen kan / durch söliche weg in ein gemel pringen.

Hernach will ich vnderweyssen / wie man ein yetlich ding das man sihet / vnd nit fast weye stet durch drey feden messen / vnd dardurch in ein gemel pringen mag.

Ein anders will ich leren was man sihet wie man das mag durchzeychenen

Wilt du durch zeychenen was du for dir sihest / so rüst for einen geschickten zeug darzu / nemlich also.

Nimm ein reyn flach glas in ein gefierte ram / darnach mach ein pret so preyt als die ram ist / aber lenger / vnd beschlag die glas ram mit zweyen panden / vnd nagel pede pant auf der anderen seyten der gelenck innen an das pret / also das die ram vnd das pret daran auf vnd zu müg than werden wie ein pret spil / auf das man das glas auf das pret so man will nider müg legen zu behalte. Darnach schlag auf beden seyten mitten in dz pret zwey klöblein mitt eysnen stenglen die sich gelencken lassen / vñ mach die so lang dz sie die ram des glases erreychen / so du die von dem pret zu gleychen winckelen auf hebest / vnd mach fornen die stenglen flach vnd ein loch dardurch / vñ schlag ein hecklein darhinder das omb gee / darnach schlag in die glas ram zu peden seyten da die flech der stenglein hin reychen zwey klöblein / so du dan die stenglein daran legst vnd die hecklein für thust so stet die ram fest / darnach mach ein gefiert oberlengt holz lenger dann das pret preyt ist / das nym auf einer seyten auß so preyt das pret ist / vnd das dz gefiert holz zu peden seyten mit seiner genße für das pret gee / vnd zwing diß holz also in dem außgenumen zwerchs auf das pret / auf das man es hin vnd wider gegen dem glas vñ darfan schiebē müg / diß vier ecket holz so auf dē pret ligt nim in der mitt oben nach lengs vierecket holl auß / aber nit gar biß an die örter / aber durch die zwey örter por zwey runde löcher / dadurch stos ein lange schrauben / aber dise schrauben soll in den runde löcheren nit geschraubt sein / allein darzwischen / nym mach ein ander holz der halben ram hoch / das zepf vnden gerecht in die gefierten nuet des zwerch holz / vñ das der vberschus zu beden seyten an dem aufrechten holz auf dem zwerche plat auflige / auf das / dz aufrecht holz winckelrecht hin vnd her zwerchs geschoben müg werden / vnd